

SANCTISSIMI DOMINI NOSTRI

CLEMENTIS XI.

PONTIFICIS MAXIMI

CONSTITUTIO

UNIGENITUS.

Providè, ac justissimè damnans Propositiones centum & unam, excerptas ex Libro Gallico *Observationum Moralium in Novum Testamentum,*

Theologicè propugnata.

P A R S I.

Quæ versatur circa Constitutionis EXORDIUM,
& priores quadraginta tres
PROPOSITIONES de GRATIA.

De Constitutionis EXORDIO
 CAPUT UNICUM.

Sua dignitas, & æquitas ei asseritur.



UISQUIS non hostilibus oculis legere solet Pontificum Romanorum Brevia, Decreta, & Constitutiones, miratur & laudat elucentem ubique sapientiam, gravitatem, sententiarum de-

lectum, verba Scripturarum, ac Patrum aptissimè collocata; etiam nitorem atque elegantiam sermonis. In exordiis sive captanda est benevolentia, sive exornanda sunt laudibus virtutes, sive reprehendenda vitia, lectoris animus accommodat ad personas, & materiam oratione disponitur.

Is scriptionis modus vehementer displicet Quæsnello, & ejus sociis, qui dolent

tam congruis se perstringi sententiis, & ad movendos contra se fidelium animos peridoneis. Vellent blanditiis, & adulatione suaviter deliniri, aut tam molliter increpari, quàm Ophni, & Phinees ab Heli patre suo; quæ nimia in castigando lenitas tantam Sacerdoti, & Prophetæ, aliàs optimo, accersit maledictionem. Mallent saltèm inconditis, & insulsis phrasibus excipi, quas vulgi possent exponere ludibrio. Nunc præter acrimoniam, accusant compositionem veluti nimium expolitam, quæ non stylum Pontificis referat, sed Oratoris, sive, ut ajunt, *Rhetoris*. Hinc apud imperitos authoritatem Constitutioni detrahere conantur, quasi à Rhetore composita, non à Pontifice, non plus ponderis habere debeat, non plus mereatur reverentiæ, quàm privati lucubratio scriptoris. Quæ si valuerit ratio, omnes leges Cæsareæ, omnia Regum, & Principum Edicta, pleræque Epistolæ & Documenta Pastoralia Episcoporum, plurimæ Pontificum Bullæ robur amittent, quæ ab inferioribus juxta significatam sibi à superioribus mentem concinantur,